

UCAPAN PERDANA MENTERI DI PEMBUKAAN  
RASMI PUSAT PENYELIDIKAN LKTP, TEKAM,  
TEMERLOH, PAHANG PADA 3HB FEBRUARI,  
1972

Y A . B . Tan Sri Yahya,<sup>1</sup> Y.B. Encik Ghaffar Baba,<sup>2</sup> Y.B. Encik Musa Hitam,<sup>3</sup> Saudara-saudara sekalian.

Saya sukacita kerana pertama kali dapat datang ke Pusat Penyelidikan Tekam ini sambil mengucapkan berbanyak-banyak terimakasih kerana telah diminta merasmikan pembukaannya.

Saya masih ingat hanya beberapa tahun yang lepas kawasan Jengka ini termasuk Tekam masih merupakan kawasan Hutan Simpan. Tadi, semasa dalam perjalanan kemari, saya perhatikan satu perubahan besar sudah berlaku. Kawasan-kawasan hutan belantara yang tebal telah berganti menjadi ladang-ladang kelapa sawit yang menghijau dan indah dipadang mata.

Pelawat-pelawat lain yang pernah datang ke mari menyatakan rasa takjub mereka melihat perubahan alam yang sebegitu rupa. Presiden Bank Dunia, Tuan Robert McNamara yang telah datang tiga bulan dulu menyatakan rasa penuh gembira dan optimism kepada saya mengenai hari depan yang cerah untuk negara kita.

Saudara-saudara sekalian.

Semua perubahan yang berlaku ini ialah hasil dari perancangan yang kita buat, diikuti dengan kekuatan tenaga dan titik peluh saudara-saudara peserta LKTP ini. Saya dan rakan-rakan saya yang memimpin Kerajaan sekarang ini sedang memikirkan segala langkah yang patut diambil untuk membaiki keadaan ekonomi rakyat luar bandar khususnya dan meninggikan taraf hidup mereka supaya sama-sama menikmati kemewahan dan kemakmuran zaman moden ini.

<sup>1</sup> Y.A.B. Menteri Besar Pahang.

<sup>2</sup> Y.B. Menteri Pembangunan Negara dan Luar Bandar.

<sup>3</sup> Pengemsi FELDA.

Tidak syak lagi usaha-usaha pembangunan yang sedemikian pesat bergantung pada kemampuan yang ada pada Kerajaan dan rakyat terutama sekali di bidang ilmu pengetahuan dan teknologi. Boleh dikatakan bahawa kemajuan yang dicapai dalam pembangunan kawasan Tigasegi Jengka ini adalah hasil dari perpaduan tenaga manusia dan teknologi.

Bagaimanapun, perkembangan teknologi yang lebih berkesan adalah bergantung pada penyesuaiannya dengan keadaan dan keperluan tempatan. Ada pula beberapa aspek yang perlu kita majukan sendiri untuk memenuhi keperluan-keperluan yang khas dengan keadaan kita. Ini menghendaki usaha-usaha penyelidikan yang benar-benar tersusun dan teratur. Oleh itu bolehlah dianggap penyelidikan sebagai urat nadi pembangunan. Untuk meningkatkan kemajuan pembangunan, mestilah ada bersaing serentak usaha-usaha penyelidikan. Ibarat pohon, pembangunan akan tumbuh subur dengan adanya baja yang baik iaitu penyelidikan tadi.

Saudara-saudara sekalian,

Dalam hal ini Kerajaan telah pun mengambil langkah-langkah positif dengan menubuhkan badan-badan penyelidikan yang khusus bagi sesuatu bidang. Pusat Penyelidikan Getah kita telah pun terkenal harum di seluruh dunia kerana hasil-hasil usahanya mengeluarkan getah SMR. Pusat Penyelidikan Hutan di Kepong juga sedang menjalankan kajian-kajian penting mengenai penggunaan kayu termasuk perusahaan membuat kertas. Sejak beberapa tahun, Pusat Penyelidikan Koko di Tawau telah menghasilkan benih-benih koko yang bermutu tinggi.

Dua badan penyelidikan yang terbaru ialah MARDI yang khusus bertugas di lapangan pertanian. Saya telah mengarahkan raereka supaya membuat penyelidikan mengenai hasil-hasil tanaman yang boleh menjadi bahan-bahan perindustrian di samping menjalankan kajian-kajian di kawasan baru Pahang Tenggara dan juga Johor Tenggara.

Yang lagi satu ialah NISIR—ini merupakan badan utama yang bakal meneroka jalan untuk memperkembangkan perindustrian melalui applied research.

Saya berbangga melihat adanya langkah tegas di lapangan penyelidikan yang dijalankan oleh LKTP. Pusat Penyelidikan ini amat besar maknanya demi perkembangan dan kemajuan usaha-usaha LKTP di masa hadapan.

Bagi pihak Kerajaan, Pusat ini dianggap sama penting dengan lain-lain yang sudah ada dan kerana itulah Kerjaan kita bersama-sama Bank Dunia telah sapakat kata untuk membiayai projek ini.

Saudara-saudara sekalian,

Meskipun Pusat Penyelidikan ini adalah terutama untuk keperluan-keperluan rancangan LKTP di Jengka, saya percaya hasil-hasil penyelidikan di sini dapat memberi munafaat kepada rancangan-rancangan lain. Saya sukacita melihat usaha-usaha yang dijalankan di sini diversified iaitu bukan sahaja untuk bidang pertanian saja bahkan termasuk penternakan dan lain-lain. Inilah cara yang patut dilaksanakan supaya dapat memenuhi semua lapangan kehidupan luar bandar.

Seperkara lagi yang lebih menggembirakan ialah semangat dedikasi ahli-ahli sains yang bertugas di sini. Kalau di Soviet Union umpamanya ahli-ahli sains sanggup tinggal di perkampungan-perkampungan kecil jauh di Siberia, negara kita boleh berbangga dengan semangat dan ketabahan hati saudara-saudara bertugas di sini jauh dari kesenangan dan suasana hidup di bandar-bandar—away from the bright lights, in the interest of science and the nation. Inilah semangat pahlawan baru yang berjuang di barisan hadapan dalam perjuangan menghapuskan kemiskinan dan kejahilan.

Saya percaya dan yakin bahawa garis-garis tindakan yang telah kita tentukan untuk membawa negara dan rakyat ke arah zaman gemilang adalah yang paling wajar dan bijaksana. Sedikit demi sedikit, kita dapat menyaksikan dengan mata sendiri kemajuan yang dicapai dan ini akan dapat dilipatgandakan melalui hasil-hasil penyelidikan yang berjalan di sini.

Saya ingin mengambil kesempatan ini menyatakan terimakasih kepada negara-negara sahabat yang membantu projek penyelidikan ini iaitu Kerajaan-kerajaan Belanda, Belgium, Bangsa-bangsa Bersatu dan Bank Dunia. Dengan itu saya dengan penuh sukacita merasmikan pembukaan Pusat Penyelidikan Tekam ini dan berharap ia berjaya dalam tugas-tugasnya.